

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

**Rješenje**

**po Zahtjevu za pojedinačno izuzeće sporazuma od strane privrednog subjekta „Coca-Cola HBC Srbija“ d.o.o Zemun, Republika Srbija**

**Sarajevo**  
**maj, 2018. godine**



Broj: UP-06-26-4-023-13/17  
Sarajevo, 8.5.2018.godine

Na osnovu člana 25., člana 42. stav (2), a u vezi sa članom 4. stav (1) i (3), članom 5. i članom 6. stav (2) i (5) Zakona o konkurenciji ("Službeni glasnik BiH", br. 48/05, 76/07 i 80/09) u postupku pokrenutom po Zahtjevu za pojedinačno izuzeće sporazuma od zabrane, zaprimljenom dana 14.07.2017. godine pod brojem: UP-06-26-4-023-1/17, od strane privrednog subjekta „Coca-Cola HBC Srbija“ d.o.o Zemun, Batajnički drum 14-16, 11080 Beograd, Republika Srbija, Konkurencijsko vijeće Bosne i Hercegovine na 27. (dvadesetsedmoj) sjednici održanoj dana 8.05.2018. godine, donijelo je

### **R J E Š E N J E**

1. Utvrđuje se pojedinačno izuzeće od zabrane Sporazuma o ograničenjima prodavca i dioničara u vezi sa Sporazumom o kupovini robne marke između privrednih subjekata „Coca-Cola HBC Srbija“ d.o.o Beograd, Republika Srbija i „MB IMPEKS“ d.o.o Banja Luka, Bosna i Hercegovina, u smislu člana 4. stav (1) i (3) i člana 5. Zakona o konkurenciji.
2. Pojedinačno izuzeće od zabrane sporazuma iz tačke (1) dispozitiva ovog Rješenja utvrđuje se na vremenski period od 3 (tri) godine i važi od dana njegovog zaključenja, u skladu sa članom 6. stav (5) Zakona o konkurenciji.
3. Ovo Rješenje je konačno i bit će objavljeno u Službenom glasniku Bosne i Hercegovine, službenim glasilima entiteta i Brčko distrikta Bosne i Hercegovine.

### **O b r a z l o ž e n j e**

Konkurencijsko vijeće Bosne i Hercegovine (dalje u tekstu: Konkurencijsko vijeće) je dana 14.07.2017. godine pod brojem: UP-06-26-4-023-1/17 zaprimilo Zahtjev za pojedinačno izuzeće od zabrane (dalje u tekstu: Zahtjev za pojedinačno izuzeće) Sporazuma o ograničenjima prodavca i dioničara u vezi sa Sporazumom o kupovini robne marke sklopljenog između privrednih subjekata „Coca-Cola HBC Srbija“ d.o.o Zemun, Batajnički drum 14-16, 11080 Beograd, Republika Srbija, (dalje u tekstu: Coca Cola Srbija ili Podnosilac zahtjeva) i „MB IMPEKS“ d.o.o Banja Luka, Jovana Bijelića bb, 78000 Banja Luka, Bosna i Hercegovina (dalje u tekstu: MB Impeks) u smislu člana 5. stav (1) Zakona o konkurenciji ("Službeni glasnik BiH", br. 48/05, 76/07 i 80/09) (dalje u tekstu: Zakon).

Zahtjev za pojedinačno izuzeće je Konkurencijskom vijeću u ime Podnosioca zahtjeva, dostavljen od strane Advokatskog društva Marić & Co d.o.o., Mehmeda Spahe 26, 71000 Sarajevo, Bosna i Hercegovina i to advokata Ezmane Turković i Džane Smailagić-Hromić (dalje u tekstu: Punomoćnik podnosioca zahtjeva).

Uvidom u dostavljenu dokumentaciju utvrđeno je da predmetni Zahtjev za pojedinačno izuzeće nije potpun, pa je Konkurencijsko vijeće u skladu sa odredbom člana 28. Zakona, aktima broj: UP-06-26-4-023-2/17 od 15.9.2017. godine i UP-06-26-4-023-4/17 od 1.10.2017.godine, zatražilo dopunu istog.

Podnosilac Zahtjeva podnescima broj: UP-06-26-4-023-3/17 od 28.9.2017. godine i UP-06-26-4-023-5/17 od 10.11.2017.godine, Konkurencijskom vijeću dostavio je traženo.

Potvrda o kompletnom i urednom Zahtjevu za pojedinačno izuzeće, shodno članu 28. stav (3), izdata je od strane Konkurencijskog vijeća dana 30.1.2018. godine pod brojem: UP-06-26-4-023-6/17.

Podnosilac zahtjeva u Zahtjevu za pojedinačno izuzeće, u bitnom, navodi sljedeće:

- privredni subjekt Coca Cola Srbija je dana 30.6.2017. godine sklopio „Ugovor o kupovini robne marke“, kojim od privrednog subjekta MB Impeks kupuje pravo vlasništva i ovlaštenja za određena imena domena i određene žigove alkoholnih pića, uključujući bez ograničenja <sup>1</sup>(..)\*\*;
- Pored „Ugovora o kupovini robne marke“, privredni subjekti Coca Cola Srbija i MB Impex su istog dana zaključili i „Sporazum o ograničenjima prodavca i dioničara u vezi sa Sporazumom o kupovini robne marke između privrednih subjekata Coca-Cola HBC Srbija i MB Impeks“ (dalje u tekstu: Sporazum), kojim su predviđena određena ograničenja u odnosu na poslovanje prodavca, tj. privrednog subjekta MB Impeks;
- ograničena poslovna djelatnost predstavlja ili bi mogla predstavljati konkurenciju bilo kom dijelu poslovne djelatnosti koja je predmet Sporazuma u obliku u kojem je ona izvođena na dan izvršenja, konkretno maloprodaja ili veleprodaja i distribucija bilo kog proizvoda, ili bilo koji vid razvoja, proizvodnje, flaširanja, organizacije događaja, ili prodajne i marketinške aktivnosti u vezi sa proizvodnjom u kategoriji (..)\*\* ;
- da se u predmetnom Sporazumu prodavac, MB Impeks i dioničari, obavezuju da (..)\*\*;
- da predmetni Sporazum nije sveobuhvatan te predviđa i izuzetke i dozvoljava privrednom subjektu MB Impeks obavljanje aktivnosti koje može izvoditi bilo kada u skladu sa fer i zakonitom tržišnom praksom i to (..)\*\*;
- da će privredni subjekt MB Impeks nakon transakcije iz „Ugovora o kupovini robne marke“, a kojom će doći do prenosa kompletnog asortimana i prava na proizvodnju gore pobrojanih proizvoda (voćnih brendija i aperitiva), nastaviti da vrši proizvodnju za Podnosioca zahtjeva, prema brendovima/žigovima koji su predmet transakcije;
- Podnosilac zahtjeva, kao sticatelj brenda, neće se baviti proizvodnjom predmetnih alkoholnih pića na tržištu Bosne i Hercegovine, tako da ostaje ista konkurencija odnosno tržišno učešće kao i prije ove transakcije;
- obavezu podnošenja predmetnog Zahtjeva za pojedinačno izuzeće, Podnosilac Zahtjeva nalazi u činjenici da Sporazum ne potpada pod grupno izuzeće vertikalnih sporazuma zbog prihoda koji učesnici predmetnog Sporazuma ostvaruju na tržištu Bosne i Hercegovine, te je predmetni Zahtjev za pojedinačno izuzeće, podnesen u smislu člana 5., a u vezi s članom 4. stav (3) Zakona;
- pojedinačno izuzeće se traži na period od 3 (tri) godine;
- Podnosilac zahtjeva „Ugovorom o kupovini robne marke“, kupuje (..)\*\*;
- da se predviđaju pogodnosti za potrošače u pogledu cijena, te uvođenja savremene tehnologije u proces proizvodnje;
- da Sporazum za koji se traži pojedinačno izuzeće nije zabranjen, jer doprinosi unapređenju proizvodnje i distribucije roba (alkoholnih pića i likera) kako na teritoriji Bosne i Hercegovine, tako i van njenih granica, pri čemu su u Sporazumu navedena samo ona ograničenja neophodna za postizanje ciljeva usljed kojih ne dolazi do isključivanja konkurencije u bitnom dijelu predmetnih proizvoda;
- da je osnovna djelatnost privrednog subjekta Coca Cola Srbija proizvodnja osvježavajućih pića, mineralne vode i ostale flaširane vode te da na teritoriji Bosne i Hercegovine ima jedno povezano društvo, a to je privredni subjekt Coca-Cola HBC B-H d.o.o Sarajevo, čija je pretežna djelatnost proizvodnja osvježavajućih pića i mineralne vode i drugih flaširanih voda;
- pretežna registrovana djelatnost privrednog subjekta MB Impeks je destilovanje, prečišćavanje i mješanje alkoholnih pića, a na teritoriji Bosne i Hercegovine nema povezanih društava;
- da na tržištu proizvodnje voćnih likera, brendija i aperitiva u Republici Srpskoj u 2016. godini, privredni subjekt MB Impeks ima tržišno učešće od (..)\*\*%, dok podnosilac zahtjeva nije prisutan na ovom tržištu odnosno ima tržišno učešće (..)\*\*%.

---

<sup>1</sup>(..)\*\* podatak predstavlja poslovnu tajnu

Na osnovu navedenog Podnosilac zahtjeva traži pojedinačno izuzeće od zabrane sporazuma u smislu člana 5. stav (1) Zakona na period od 3 (tri) godine.

Konkurencijsko vijeće je na osnovu navoda iz Zahtjeva i dostavljene dokumentacije, ocijenilo da pojedinačno izuzeće Sporazuma nije moguće utvrditi bez provođenja postupka, pa je shodno tome dana 28.2.2018. godine pod brojem: UP-06-26-4-023-8/17 donijelo Zaključak o pokretanju postupka (u daljem tekstu: Zaključak), koji je u skladu sa članom 33. stav (1) Zakona, dostavljen podnosiocu zahtjeva pod brojem UP-06-26-4-023-12/17.

## **1. Stranke u postupku**

Učesnici Sporazuma o ograničenjima prodavca i dioničara u vezi sa Sporazumom o kupovini robne marke između privrednih subjekata Coca-Cola HBC Srbija i MB Impeks su privredni subjekti Coca-Cola HBC Srbija“ d.o.o Zemun, Batajnički drum 14-16, 11080 Beograd, Republika Srbija i „MB IMPEKS“ d.o.o Banja Luka, Jovana Bijelića bb, 78000 Banja Luka, Bosna i Hercegovina.

### **1.1 Privredni subjekt Coca Cola Srbija ( podnosilac Zahtjeva za pojedinačno izuzeće)**

Privredni subjekt Coca Cola Srbija je registrovan pod poslovnim imenom Coca-Cola Hellenic Bottling Company-Srbija, industrija bezalkoholnih pića d.o.o. Brograd (Zemun) kod Agencije za privredne subjekte Republike Srbije pod registarskim brojem: 07462905. Osnivač i vlasnik privrednog subjekta Coca Cola Srbija je privredni subjekt CC Beverages Holdings II B.V. Holandija sa (..)\*\*% vlasničkog udjela.

Pretežna registrovana djelatnost privrednog subjekta Coca Cola Srbija je proizvodnja osvježavajućih pića, mineralne vode i ostale flaširane vode.

#### **1.1.1 Povezano društvo privrednog subjekta Coca-Cola Srbija**

Privredni subjekt Coca Cola Srbija, ne djeluje direktno na tržištu Bosne i Hercegovine, odnosno direktni tržišni udio ovog privrednog subjekta iznosi (..)\*\*%.

Na području Bosne i Hercegovine Podnosilac zahtjeva ima jedno povezano društvo, privredni subjekt Coca-Cola HBC B-H d.o.o Sarajevo, Mostarsko raskršće bb, Sarajevo, Hadžići, Bosna i Hercegovina (u daljem tekstu: Coca-Cola B-H).

Privredni subjekt Coca-Cola B-H je upisan u registar poslovnih subjekata kod Opštinskog suda u Sarajevu pod matičnim brojem: 65-01-0806-09. Osnivač i vlasnik privrednog subjekta Coca-Cola B-H je privredni subjekt CC Beverages Holdings II B.V. Holandija sa (..)\*\*% vlasničkog udjela i upisanim kapitalom u iznosu od (..)\*\*KM.

Pretežna registrovana djelatnost privrednog subjekta Coca-Cola B-H je proizvodnja osvježavajućih pića i mineralne vode i drugih flaširanih voda.

### **1.2 Privredni subjekt MB Impeks (kao prodavac)**

Privredni subjekt MB Impeks d.o.o. Banja Luka društvo za trgovinu, proizvodnju i export-impor upisan je u registar poslovnih subjekata kod Okružnog suda u Banja Luci, pod matičnim brojem 1-8242-00 i osnivačkim kapitalom u iznosu od (..)\*\*KM. Osnivač i (..)\*\* % vlasnik ovog privrednog subjekta je fizičko lice (..)\*\*.

Pretežna registrovana djelatnost privrednog subjekta MB Impeks je destilovanje, prečišćavanje i mješanje alkoholnih pića.

MB Impeks nema povezanih društava u Bosni i Hercegovini.

## 2. Pravni okvir predmetnog postupka

Konkurencijsko vijeće je u provođenju predmetnog postupka primijenilo odredbe Zakona, Odluke o grupnom izuzeću sporazuma između privrednih subjekata koji djeluju na različitim nivoima proizvodnje odnosno distribucije (vertikalni sporazumi) ("Službeni glasnik BiH", broj 18/06), Odluke o grupnom izuzeću sporazuma između privrednih subjekata koji djeluju na istom nivou proizvodnje odnosno distribucije horizontalni sporazumi), a koji se posebno odnose na istraživanje, razvoj i specijalizaciju ("Službeni glasnik BiH", broj 15/06), Odluke o utvrđivanju relevantnog tržišta ("Službeni glasnik BiH", br. 18/06 i 34/10) i odredbe Zakona o upravnom postupku ("Službeni glasnik BiH", br. 29/02, 12/04, 88/07, 93/09, 41/13 i 53/16), u smislu člana 26. Zakona.

## 3. Relevantno tržište i analiza

Kako bi utvrdilo da li su ispunjeni uslovi za pojedinačno izuzeće, Konkurencijsko vijeće je prilikom ocjene predmetnog Ugovora utvrdilo relevantno tržište proizvoda i relevantno geografsko tržište, a u skladu sa članom 3. Zakona i odredbama Odluke o utvrđivanju relevantnog tržišta.

Relevantno tržište, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda koje su predmet obavljanja djelatnosti na određenom geografskom tržištu. Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode koje potrošači smatraju međusobno zamjenjivim, pod prihvatljivim uslovima, imajući u vidu posebno njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Relevantno tržište za ocjenu predmetnog sporazuma određeno je prema osnovnoj djelatnosti i geografskom području na kojem učesnici u sporazumu obavljaju djelatnost.

Samim odredbama predmetnog Sporazuma usko je definisano relevantno tržište proizvoda, kao tržište destilovanja, prečišćavanja i mješanja alkoholnih pića tj. voćnih likera, brendija i aperitiva.

Uzimajući u obzir činjenicu da privredni subjekt MB Impeks proizvodnju obavlja samo u Republici Srpskoj, relevantno geografsko tržište obuhvata područje Republike Srpske u Bosni i Hercegovini.

Slijedom navedenog, kao predmetno relevantno tržište određuje se tržište destilovanja, prečišćavanja i mješanja alkoholnih pića (voćnih likera, brendija i aperitiva) na teritoriji Republike Srpske u Bosni i Hercegovini.

Procjena tržišnog učešća učesnika Sporazuma i njihovih glavnih konkurenata na utvrđenom relevantnom tržištu u 2016. godini, je sljedeća:

Tabela 1.

Redni br.	Privredni subjekti	Procjena tržišnog učešća u Republici Srpskoj
1.	MB Impeks	(..)**
2.	Coca-Cola B-H	(..)**
3.	Agrogrup	(..)**
4.	Monogram	(..)**
5.	Bobita	(..)**
6.	Agrodestil	(..)**
7.	Ostali	(..)**
	<b>Ukupno</b>	<b>100%</b>
	<b>Ukupno 1+2</b>	(..)**

\* Izvor: podaci iz zahtjeva podnosioca

Učesnici predmetnog sporazuma, kako se vidi iz podataka tabele 1., kao i podataka o registrovanim djelatnostima iz tačke 1. Obrazloženja ovog rješenja, nisu međusobni konkurenti jer posluju i ostvaruju tržišna učešća na različitim nivoima odnosno različitim relevantnim tržištima.

Prije provođenja predmetnog sporazuma privredni subjekt Coca Cola Srbija nije bio prisutan (niti direktno niti preko svojih povezanih društava) na relevantnom tržištu proizvodnje voćnih likera, brendija i aperitiva na teritoriji Republike Srpske u Bosni i Hercegovini, dok je privredni subjekt MB Impeks imao (..) \*\* % udjela na utvrđenom relevantnom tržištu, što znači da bi nakon provođenja predmetnog sporazuma stanje na relevantnom tržištu ostalo nepromjenjeno.

#### 4. Priroda, predmet i cilj sporazuma

Učesnici predmetnog Sporazuma za koji se traži pojedinačno izuzeće od zabrane, nisu stvarni ni potencijalni konkurenti, s obzirom da su aktivni na različitim relevantnim tržištima.

Privredni subjekt Coca Cola Srbija je aktivan u proizvodnji osvježavajućih pića, mineralne vode i ostale flaširane vode, kao i njegovo povezano društvo na teritoriji Bosne i Hercegovine.

Privredni subjekt MB Impex aktivan je na tržištu destilovanja, prečišćavanja i mješanja alkoholnih pića.

Nakon provođenja predmetnog sporazuma, privredni subjekt MB Impex nastavit će da vrši proizvodnju za Podnosioca zahtjeva, prema brendovima/žigovima, koji su predmet ove transakcije odnosno predmetnog sporazuma.

Podnosilac zahtjeva, odnosno privredni subjekt Coca Cola Srbija, kao sticatelj brenda, neće se baviti proizvodnjom predmetnih alkoholnih pića na tržištu Bosne i Hercegovine.

Podnosilac zahtjeva za pojedinačno izuzeće smatra da predmetni Sporazum prema odredbama člana 5. Odluke o grupnom izuzeću sporazuma između privrednih subjekata koji djeluju na različitim nivoima proizvodnje odnosno distribucije (vertikalni sporazumi) ("Službeni glasnik BiH", broj 18/06), ne potpada pod grupno izuzeće vertikalnih sporazuma, zbog prihoda koji učesnici predmetnog Sporazuma ostvaruju na tržištu Bosne i Hercegovine.

Ukupno ostvareni prihodi učesnika Sporazuma i njihovih povezanih društava, prema završnim finansijskim izvještajima za 2016. godinu, iznose kako slijedi:

Tabela 2.

Red.br	Naziv privrednog subjekta	Prihod u BiH (KM)	Prihod u svijetu (KM)
01.	<b>Coca Cola Srbija</b>	(..) **	(..) **
	Coca Cola B-H	(..) **	(..) **
02.	<b>MB Impeks</b>	(..) **	(..) **

\*Izvor: podaci iz zahtjeva

Stoga, obavezu podnošenja Konkurencijskom vijeću, Zahtjeva za pojedinačno izuzeće predmetnog sporazuma od zabrane, Podnosilac Zahtjeva nalazi u odredbama člana 5., a u vezi s članom 4. stav (3) Zakona o konkurenciji.

Sporazum za koji se traži pojedinačno izuzeće, potpisan je dana 30.6.2017.godine, na period od 3 (tri) godine i kako je navedeno u samom sporazumu, ostaje na snazi i obavezujući je po strane do donošenja konačnog rješenja Konkurencijskog vijeća o pojedinačnom izuzeću ovog sporazuma od zabrane.

Predmetnim sporazumom su predviđena određena ograničenja u odnosu na poslovanje privrednog subjekta MB Impeks u smislu jasno određenih i pobrojanih aktivnosti u vezi sa proizvodnjom u kategoriji (..) \*\* (voćnih likera, brendija i aperitiva), ali i predviđeni izuzeci kojim se dozvoljava privrednom subjektu MB Impeks obavljanje aktivnosti koje može izvoditi bilo kada u skladu sa fer i zakonitom tržišnom praksom, vezano za iste proizvode, ali ispod (..) \*\* kategorije.

Cilj sporazuma, kako navodi Podnosilac zahtjeva, jeste kupovina (..)\*\*.

## 5. Efekti koji će nastati provođenjem sporazuma

Sporazumom za koji se traži pojedinačno izuzeće od zabrane, predviđaju se pogodnosti za potrošače u pogledu cijena.

Također se predviđaju pogodnosti u smislu uvođenja savremene tehnologije u sam proces proizvodnje voćnih likera, brendija i aperitiva na teritoriji Bosne i Hercegovine u svrhu specijalizacije i proširenja ovog proizvodnog segmenta alkoholnih pića, uz stvaranje šire i snažnije osnove za trgovinu i izvoz istih.

Očekuje se da će predmetni Sporazum u tom smislu doprinijeti unapređenju distribucije voćnih likera, brendija i aperitiva, kako na teritoriji Bosne i Hercegovine, tako i van njenih granica.

## 6. Utvrđeno činjenično stanje i ocjena dokaza

U skladu sa članom 4. stav (1) Zakona, zabranjeni su sporazumi, ugovori, pojedine odredbe sporazuma ili ugovora, zajednička djelovanja, izričiti i prešutni dogovori privrednih subjekata, kao i odluke i drugi akti privrednih subjekata koji za cilj i posljedicu imaju sprječavanje, ograničavanje ili narušavanje tržišne konkurencije na relevantnom tržištu, a koji se odnose na direktno ili indirektno utvrđivanje kupovnih i prodajnih cijena ili bilo kojih drugih trgovačkih uslova, ograničavanje i kontrolu proizvodnje, tržišta, tehničkog razvoja ili ulaganja, podjelu tržišta ili izvora snabdijevanja, primjenu različitih uslova za identične transakcije sa drugim privrednim subjektima, dovodeći ih u nepovoljan položaj u odnosu na konkurenciju, zaključivanje takvih sporazuma kojima se druga strana uslovljava da prihvati dodatne obaveze koje po svojoj prirodi ili običajima u trgovini nisu u svezi sa predmetom sporazuma.

U smislu člana 4. stav (3) Zakona, predmetni sporazumi nisu zabranjeni ako doprinose unapređenju proizvodnje ili distribucije robe i/ili usluga unutar Bosne i Hercegovine, ili promociji ekonomskog i tehničkog razvoja, pri čemu potrošačima omogućavaju pravičan udio koristi koja iz njih proizilazi, a koji nameću samo ograničenja neophodna za postizanje ciljeva i ne omogućavaju isključivanje konkurencije u bitnom dijelu predmetnih proizvoda ili usluga.

U skladu s članom 5. stav (1) Zakona, Konkurencijsko vijeće, na zahtjev jedne ili više stranaka u sporazumu može donijeti rješenje o pojedinačnom izuzeću od zabrane sporazuma, iz člana 4. stav (1) Zakona, ako sporazum ispunjava uslove, iz člana 4. stav (3) Zakona.

U konkretnom slučaju radi se o sporazumu o ograničenjima prodavca i dioničara u vezi sa Sporazumom o kupovini robne marke između privrednih subjekata Coca-Cola HBC Srbija i MB Impeks“, kojim su predviđena određena ograničenja u odnosu na poslovanje prodavca, tj. privrednog subjekta MB Impeks u smislu maloprodaje ili veleprodaje i distribucije bilo kog proizvoda, ili bilo koji vid razvoja, proizvodnje, flaširanja, organizacije događaja, ili prodajne i marketinške aktivnosti u vezi sa proizvodnjom u kategoriji (..)\*\* (voćnih likera, brendija i aperitiva).

Predmetnim sporazumom, sem preciziranih ograničenja, predviđeni su i izuzeci gdje je privrednom subjektu MB Impeks dozvoljeno obavljanje aktivnosti koje može izvoditi bilo kada u skladu sa fer i zakonitom tržišnom praksom i to: proizvodnja i distribucija proizvoda iz kategorije (..)\*\* ispod (..)\*\* kategorije isključivo definisane od strane Podnosioca zahtjeva, proizvodnja i distribucija proizvoda iz kategorije (..)\*\* na dan izvršenja pod robnom markom (..)\*\* i svih njenih varijacija, proizvodnja i distribucija proizvoda iz kategorije (..)\*\* na dan izvršenja pod robnom markom (..)\*\* i svih njenih varijacija, te u toku trajanja Sporazuma, a na osnovu narativa koji odobri Podnosilac zahtjeva, sebe predstavljati kao ekskluzivnog dobavljača ovih određenih proizvoda (voćnih likera, brendija i aperitiva), a koji se proizvode i prodaju pod zaštićenim imenom.

Konkurencijsko vijeće je izvršilo analizu predmetnog sporazuma, u smislu provjere uslova za postojanje grupnog izuzeća, koja su propisana u članu 7. stav (1) tačka b) Zakona, a vezano za odredbe Odluke o grupnom izuzeću sporazuma između privrednih subjekata koji djeluju na različitim nivoima proizvodnje odnosno distribucije (vertikalni sporazumi). Utvrđeno je da se u predmetnom slučaju navedene odredbe o grupnim izuzećima ne mogu primjeniti, jer nije ispunjen uslov iz člana 5. ove Odluke, predviđen za grupno izuzeće sporazuma od zabrane.

Provedenom analizom, utvrđeno je da predmetni sporazum sadrži odredbe koje ograničavaju konkurenciju, a koje se odnose na zabranjene sporazume propisane u članu 4. stav (1) Zakona, ali da je Podnosilac zahtjeva u dovoljnoj mjeri dokazao ispunjenost Zakonom propisanih uslova za pojedinačno izuzeće predmetnog sporazuma od zabrane, budući da će isti doprinijeti uvođenja savremene tehnologije u sam proces proizvodnje voćnih likera, brendija i aperitiva na teritoriji Bosne i Hercegovine u svrhu specijalizacije i proširenja ovog proizvodnog segmenta alkoholnih pića, uz stvaranje šire i snažnije osnove za trgovinu i izvoz istih tj. doprinijeti unapređenju distribucije voćnih likera, brendija i aperitiva unutar ali i van teritorije Bosne i Hercegovine.

Potrošačima će se također omogućiti pravičan udjel koristi koja iz njih proizilazi, jer se zaključivanjem i sprovođenjem predmetnog sporazuma, nameću samo ograničenja neophodna za postizanje ciljeva i ne isključuje konkurencije u bitnom dijelu predmetnih proizvoda i/ili usluga, u smislu člana 4. stav (3) Zakona.

Konkurencijsko vijeće je također uzelo u obzir i činjenicu da je rješavajući u predmetu po prijavi koncentracije privrednog subjekta Coca Cola HBC-Srbija d.o.o. Batajnički drum 14-16, 11 080 Beograd, Republika Srbija, donošenjem rješenja broj: UP 03-26-1-022-50/17 od 15.03.2018. godine, ocijenilo dopuštenom koncentraciju na tržištu destilovanja, prečišćavanja i mješanja alkoholnih pića, nastalu sticanjem kontrole nad intelektualnom svojinom - žigovima za alkoholna pića (voćne likere, brendije i aperitive) i proizvodnjom tih alkoholnih pića privrednog subjekta MB Impeks d.o.o., od strane privrednog subjekta Coca Cola HBC-Srbija d.o.o.

Shodno navedenom, Konkurencijsko vijeće je odlučilo kao u tački 1. dispozitiva ovog Rješenja.

Kako je odredbama člana 6. stav (2) Zakona propisano da pojedinačno izuzeće ne može trajati duže od pet godina, a stavom (5) istog člana da pojedinačno izuzeće važi od dana zaključivanja sporazuma, Konkurencijsko vijeće je odlučilo kao u tački 2. dispozitiva ovog Rješenja.

## **7. Administrativna taksa**

Podnosilac zahtjeva na ovo Rješenje, u skladu sa odredbom člana 2. stav (1) tarifni broj 107. tačka a) Odluke o visini administrativnih taksi u vezi sa procesnim radnjama pred Konkurencijskim vijećem ("Službeni glasnik BiH", br. 30/06 i 18/11) je dužan platiti administrativnu taksu u iznosu od 2.000,00 KM u korist Budžeta institucija Bosne i Hercegovine.

## **8. Pouka o pravnom lijeku**

Protiv ovog Rješenja nije dopuštena žalba.

Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovog Rješenja.

**Predsjednik**

**Ivo Jerkić**